

## SUGUNDU KARTA KU

# JON

## SKIRBI

### Introduson

Jon, garandi di igreža, i skirbi pa Siñora ku Deus kuji. Es i pudi sedu un igreža ku si membrus, o i pudi sedu un minjer krenti, ku si propi fijus o ku krentis ku ta juntaba na si kasa. Ki “irma” na v.13 pudi sedu un minjer ku kunsidu na kau nunde ku Jon staba, o i pudi sedu utru igreža.

Jon gostaba di palabras “bardadi” ku “amor”. I tenba pursoris ku na yandaba ku nsinamentu falsu. Jon da avisu pa ka risibi elis suma ermons.

### Kumsada ku manteña

<sup>1</sup>Ami, garandi di igreža, N na skirbi pa Siñora ku Deus kuji, ku si fijus, kilis ku N ama na bardadi. I ka ami son, ma tambu tudu kilis ku kunsu bardadi e ama bos, <sup>2</sup>pabia di bardadi ku sta na nos, ku sempri i na sta ku nos.

<sup>3</sup>N misti pa Deus no Pape, ku Jesus Kristu, si Fiju, danu fabur, miserikordia ku pas, na bardadi ku amor.

### Bardadi ku amor

<sup>4</sup>N kontenti dimas manera ku N oja utru di bo fijus e na yanda na bardadi, suma ku no Pape mandanu. <sup>5</sup>Asin, Siñora, N na pidu pa no ama ntru. I ka suma un nobu mandamentu ku N na skirbiu, ma i ki mesmu ku no tene disna di kumsada. <sup>6</sup>E amor i pa no yanda konformi si mandamentus. Es i mandamentu ku bo obi disna di kumsada, pa bo yanda na amor.

<sup>7</sup>Manga di nganadur spaja na mundu ku ka seta kuma Jesus

Kristu bin suma omi. Ki koldadi jinti, el ki anti-kristu nganadur. <sup>8</sup>Bo toma sintidu ku bo kabesa, pa ka bo pirdi kil ku no tarbaja pa el, ma pa bo risibi pagamentu kompletu.

<sup>9</sup>Tudu kil ku bai mas dianti di nsinamentu di Kristu, i ka fika dentru del, i ka tene Deus, ma kin ku fika na ki nsinamentu, i tene Pape tudu ku Fiju. <sup>10</sup>Si algin bin nunde bos, i ka tisi e nsinamentu, ka bo risibil na kasa, nin ka bo falal manteña di ermondadi, <sup>11</sup>pabia kil ku falal manteña i ta toma parti na kusas mau ki na fasi.

<sup>12</sup>Kontudu N tene manga di kusa pa konta bos, ma N ka misti fasil pa karta; N misti visita bos pa no papia uju ku uju, pa no kompleta no alegria.

<sup>13</sup>Fijus di bo irma ku Deus kuji e mandau manteña.

---

1.1: 1 Jon 3.18; 3 Jon 1 1.1: Jon 8.32; Eb 10.26

1.3: Rom 1.7 1.4: 3 Jon 3 1.5: Jon 13.34

1.6: 1 Jon 3.23; 5.3 1.7: 1 Jon 2.22; 4.1-3 1.8: At 20.28

1.10: Rom 16.17; 1 Kor 5.11; Gal 1.8-9 1.11: Ef 5.11;

1 Tim 5.22; Apok 18.4 1.12: 3 Jon 13-14

1.12: 1 Jon 1.4 1.13: 1 Ped 5.13